

Parosifa fain Pol-ke Taitus siisimomak

Miimow opora

Taitus me wi Yuuda teeria-ke. Nain o Kristen arep Pol uuwowa nain asipam-ikua. Pol-ke o Krit mot-pa nan wueya wi Kristen teeria nain wia urufam-ikua. Pol parosifa fain-pa feenap maakek, wi Krit sira me eliw akena, naapeya mua-ko Kristen teeria woos mua arekam naep-na o sira eliwa ookam-ikainok. Ne oko fain pun maakek, wi Kristen teeria emeria iperowa, mua iperowa, takir eliwa ne uuwow mua sesa marew uuwimik nain opora rookasep baliwep ikowa suule wiowa nain maakek.

Ne pun wia maakeya kema kuisow ikauk, mua oko wia kookaluk, me wia amukaruk ne me irakuk, nain maakek.

1 ¹Aria Taitus, yo Mua Maneka uuwow mua ne Yeesus Krai aposel Pol-ke parosifa fain no siisimomiyem. Mua Maneka ona efa pepekimeya ona teeria iiriw wia nanikap-puak nain opora baliwep wia maakemkun ona opor makena baliwep akena wiar opikuan. Ne opora opap kema pukep baliwep paayarep Mua Maneka sira-pa ikaikuan. ²Naap onami Mua Maneka wameiya anane eliwa ikaiyen naap maep kemaiw wiam tuupam-ikaikuan. Wi ikoka maa makena urufikuan, moram Mua Maneka me wadolaliya, iiriw miiwa maa muutitik me onowa ikok ona opora naap maep-puak. ³Opor eliwa makena arowowa naep ona epa iiriw pepekimep-puak. Epa nain wiar pepek ereya opora nain ariman wuak. Ne o eena yia aawow mua nain-ke yo efa maakemi efa sesekeya opora nain piawomiyem.

⁴Aria Taitus, muuka, makena i ikos Yeesus Krai opora wiar opimik. Yiena Auwa Mua Maneka ne Yeesus Krai yia aawow mua, nefa saliwami kema sonom eliwa niuk.

Taitus Krit-pa uuwak

⁵Yo feenap maep no Krit mot-pa nefa wuam, nos-ke neek ikok yo uuwowa enakiwa wuam nain welawe naep. Uuwami owow unowa sios

woos mua wia pepekim-ikiwe, yo nefa maakem naap. Mua sira baliwep wiar pupep wia pepekime. ⁶Wi mua feenap nain wia maiyem, mua nain pina-ko me oniya, o emeria kuisow, ne muuka wiipa Mua Maneka opora wiar opap sira samora me onimik, ne emina me kekanimik. ⁷Wi woos mua ikok Mua Maneka uuwowa faomami wiena teeria baliwep wia urufam-ikowa-ke. Naapeya wi pina marew ikauk. Yo yaisow naap me wiam mauk, ne mua ewur kema bagiwirow marew, ne pun mua wia iririmowa marew. Eka kekanowa me eruaruk ne maamuma me senam kookaluk. ⁸Owow oko mua kereriwkin wia tetaruk, ne sira eliwa onuk. Mua kema suuwowa eliwa, Mua Maneka opora ookuk, mua oko wia saliwuk ne wiena kukusa pun baliwep wiam saliwuk. ⁹Yeesus Kraiss opor makena ne kekanowa eena wia maakemik nain opuk. Opora kakeniw opap mua papako wia maakiwkin opora wiar opikuan. Wi naap onami wia kakeniwkin wi sira samora-pa ikemik nain kema aawikuan. Wi mua sira naap nain wia pupep wia pepekime.

¹⁰No naap uuwam-ike, moram kame nain mua unowa emin kekanowa-ke, ne opor maken marewa nain maemi wi Kristen teeria wia peeskimimik. Ne wiena pun Mua Maneka me amisaremik. Wi Yuuda Kristen aremik nain mua lawisiw unowa naap onimik. ¹¹Wi wadol opora naap nain me wia maakowa nain wia maakimik. Wi maamuma wiar aawowa muuta nain naap wia onimik. Naeya wi kerekera papako Yeesus teeria wiar ekamik nain wi opora wiar miimap unow onaiya opor makena piipuumik. Naapeya wi mua nain opaimika wia ofome. ¹²Wi wadol sira nain iiriw wiena amis mua oko-ke feenap wia maek, “Wi Krit-na wi wadol masia, wi asia akena, wi lebuma ne enow masia-ke,” naap wia maek. ¹³Opora naap wia onak nain makena. Naapeya wi wadol opora wiar ookimik nain wia kakankami ifana wiare, naeya Yeesus Kraiss opora wiar opap kekanowa iimaruk. ¹⁴Ne wi Yuuda wiena weke nanar wadola nain makena me wiar nauk, ne wi mua Mua Maneka opora mikikira iwemi sira wuomakimik nain pun me wiar ookuk. ¹⁵Moram sira naap ikua, wi Mua Maneka sira ookam-ikok kema dubil manekiw ikaimik nain sira eliwa muutiw kema wuimik. Ne wi sira samora-pa ikok opor makena me ookimik nain maa samo-samora kemaiw ikaimik. Moram sira eliwa ne sira samora rookasowa nain wi iiwawun kema marew akena. Wi sira samora onimik nain maa eliwa-ke naimik. ¹⁶Wi wiena i Mua Maneka ookimik naimik, nain wi sira-sira onami o mikikira iwimik nain-ke ariman wia wuiya. Wi mua nain mua eliw marew, emin kekanowa, ne sira eliwa ookowa nain wi me pepeka akena.

Taitus suule wiemi Kristen sira eliwa wia ofakowinok

2 ¹Aria no Mua Maneka opora maemi kakeniw wia maakeya opora baliwep ookuk. ²Wi mua iperowa suule wieya saria opuk, kema

pukep ikauk ne mia kookalowa sira-sira wiam kaikap ikauk. Mua Maneka opora kakeniw opuk, mua oko wia kookaluk ne kekanep pina kamenap wiar imenariya nain eliw akuawuk.

³Ne sira naapiw, wi emer iperowa pun wia maakeya saria sira eliwa-pa ikauk, murarow opora me wiam onuk, ne eka kekanowa me eruaruk. ⁴Wi baliwep ikok wi aakis teeria nain sira eliwa wia ofakowuk. Naeya sira eliwa wia maakiwkin eliw wienna mua wia baliwami muuka wiipa pun baliwep wia kakaltuk. ⁵Wi baliwep ikauk, soma me oruk. Uuwowa baliwep onami wienna mua opora wia miimami opora me wiar fienuk. Naap oniwwin wi sisin mua sira eliwa wiar urufap Mua Maneka opora wiar firekowa nain era marew.

⁶Ne wi mua moren takira pun naap, kema wia iikiroweya mia kookalowa sira-sira wiam kaikap ikauk. ⁷No nena pun baliwep ikaeya wi nefa urufap sira nookuk. Ne no opora wia maakin nain nirow opora saarik me one, opora make-makeniw wia maake. ⁸Opora pupep oram puukap wia maake, naeya wi opora nefar fienuwa nain kookopikuan. Wi opor ara kaanek iimarep opora yiar poraikuan, weetak. Naap maep emina ururikuan.

⁹Aria wi uuwow mua sesa marew uuwimik nain feenap wia maake, wienna saria opora wiar miimami maa unowa wi kookalimik naap wiokow muutiw. Opora wia maakiwkin me wia kiripomuk. ¹⁰Ne maa me wiar ikum aawuk. Wi uuwow mua eliwa, ne anane sira makeniw ookiwwin naap wia urufap mauk, “Aa, wi Mua Maneka opora ookimik nain wi sira makena-pa ikaimik.” Naemi Mua Maneka eena i yia aawiya nain opora wiar kookalep eliwa-ke nauk.

¹¹Wi unowiya baliwep ikauk, moram Mua Maneka yia kemalek nain ariman wuami i miww mua unowiya yia aawowa era yia wuomak. ¹²Naap onami yia paayawiya, sira feenap onowa, sira samo-samora onowa nain mikikira-pa wuowa-ke, ne mia kookalowa me ookowa-ke. Aria yiam saliwami baliwep ikok Mua Maneka sira ookowa-ke. ¹³Ne i miww-pa feek ikok naap onami Yeesus Krai ekapowa nain kemaiw yiam tuupam-ikok arewap ikaiyen. Yeesus Krai yiena Mua Maneka eena i yia aawow mua ona kekanowa-pa parin onaiya imenarowa, mua nain. ¹⁴I miww mua pina-pa ikok umemi mesenalimik, nain os-ke i epa yiar aawep umok. Fain naep umok, wi pina onowa-pa ikaiwwin wia aawemkun yena teeria kakeniw efar ikok kema dubila ne sira kakeniw ikauk, ne palanemi sira eliwa onowa kemaiw ikauk, naap maek. ¹⁵Naapeya no uuwowa nanek, kekanow onaiya ikon. No suule wiemi kema wia iikirowam-ike. Ne wi Yeesus Krai opora kapewimik nain pun wia kakenami ifana wiare. Ne mua kuisow-ko no opora me nefar porainok.

Maa eliwa nain eliw onowen

3 ¹No anane wia maakeya wi anim onoma ne wienna uuwow mua opora wiar miimuk. Ne sira eliwa onowa kemaiw ikok naap onuk.

²Mua oko opor samora me wia onuk, irakowa me imenuk, ne kekelka wia wuami saria wiuk.

³Is pun iiriw feenap ikemik, momor sira onam-ikemik, emina kekanem-ikok pina onam-ikemik. Wadol sira ookami sira samora ne miiw sira-sira nain kookalow manekiw ikemik. Mua wia samo-samoram-ikemik, maa kema wiar kuem-ikemik. Ne sira samora onami mua oko kema wia bagiwirowam-ikemik, ne pun anane kema bagiawiw ikemik. ⁴⁻⁶Ne i sira samora-pa naap ikemkun Mua Maneka-ke yia kemalep yia aawow era ariman wuami yia aawok. Nain me i sira ele-eliwa onamkun yia aawok, weetak. Ona yia kemalep pina yiar iirarek. Ne Yeesus Kraiss muuta nain Ewar Eliwa yia sesekomaya manek akena yia asipeya mua enuma saarik aremi kema suuwowa pun enuma aawemik. ⁷Ona yia kemalep pina marew yia naek, ni yo muuk teeria efar ikok owow iinan-pa anane ikowa nain kema manekiw ikeka naep naap onak. ⁸Aria yo opora maem nain makena-ke.

Naapeya yo feenap nefa maakiyem, nos-ke wia maakemi yo opor unowa maem nain wia kemapawam-ike. Naeya wi Mua Maneka opora wiar opimik nain sira eliwa onowa nain kemaiw ikok naap onam-ikauk. Naap onowa nain eliw akena, ne i mua yia asipiya.

⁹Aria wi momor opora maimik nain me wiar miime, wi nembesir teeria wiam mikap ookimik nain me wiamiya aakune, oporiw me wiamiya irake, ne Moses sira wuomakek nain maemi opor oko imenuk-na wiamiya me irake. Moram opor unowa nain oram-ke, me yia asipinon. ¹⁰Mua-ko sira nain oneya-na no maakeya nain piipuinok. Naapiw oneya-na nainiw maake. Ne opora me nefa miimap nainiw oneya-na, aa me maake, neek ikainok. ¹¹Makena, mua sira naap nain eliw paayarinan, oro-boonek ne sira samorak nain ikoka ariman arinon.

Opor papako

¹²Aria yo Atemas e Tikikus sesekiyem. O ikiwep nefar fuuneya no era akupowa ewurare, ne era imenap-na Nikopolis ikiwe. Moram yos pun Nikopolis ikiwep, neek ikok eremin saana kerereya neekeriw ikainen. ¹³Aria Senas, mua eena kot-pa opora wia asipiya nain Apolos ikos soomarimik nain wia naape. Wi maa mauwa iiwariwkin-na wieya feekiya soomaruk. ¹⁴Aria no Yeesus teeria wia maakeya wi oram maneka me yiwem-miuk. Wi uuwowa-pa baliwep ikok wiena enowa imenam-ikauk, ne mua papako pun wia asipuk.

¹⁵Aria wi teeria yo efamiya ikemik nain unowiya ni eliwa ikeka nia naimik. Ne yena emar unowa Mua Maneka opora wiar opimik nain wia maake, yo Pol-ke eliwa ikeka wia naiyem. Mua Maneka nia saliwami anane nia asipam-ikainok.